

**Kultureqarnermut, Ilinniartitaanermut, Ilisimatusarnermut, Ilageeqarnermullu  
Ataatsimiititaliap**

**pillugu**

**Efterskolit pillugit Inatsisartut inatsisaata allanngortinnissaanik siunnersuut.**

(paarlaateqatigiinnermut tapit)

(Ilinniartitaanermut, Ilisimatusarnermut Nunanullu Avannarlernut Suleqateqarnermut  
Naalakkersuisumit *saqqummiunneqartoq*)

**Pillugu**

**ISUMALIUTISSIISUTAA**

**Siunnersuutip aappassaannerneqarnerani tunniunneqartoq**

Ataatsimiititaliaq suliarinninnermini makkuninnga inuttaqarpoq:

Hans Aronsen, (IA), Siulittaasoq

Jørgen-Ole Nyboe Nielsen, (D), Siulittaasup tullia

Harald Bianco, (IA)

Ruth Heilmann, (S)

Aleqa Hammond, (S)

Siunnersuut ulloq 4. oktober 2012 suliarineqareernerata kingorna ataatsimiititliamit misissorneqarpoq.

**Siunnersuutip imarisaa siunertaalu**

Inatsisissatut siunnersuutip imarisaani qitiutinneqarpoq, Efterskolit pillugit inatsisip allanngortinneqarnissaa, taamaalilluni siunnerfilimmik paarlaasseqatigiilluni ilinniartunik 18 inorlugit ukiulinnut tunngavissaqarniassamat. Paarlaasseqatigiilluni ilinniarnermik ingerlartsineq Kalaallit Nunaata aamma Danmarkip avataani ingerlanneqassaaq, kiisalu inuusuttut piginnaasaasa, inuttut pikkorissusaasalu qaffasissusaannik annertusaanissamut siunertaqassalluni.

Inatsisissatut siunnersuummut tunngavigineqarpoq (UKA2012/68: *Inuusuttut nunanut allanut oqaatsinik ilinniariarlutik aallartartut amerlanerulernissaat anguniarlugu, Naalakkersuisut suliamik aallartitsinissamik peqquneqarnissaannik, Inatsisartut aalajangiiffigisassaattut siunnersuut. Inatsisartuni ilaasortaq Malik Berthelsen, Siunut*) saqqummiunneqartoq

tassani Naalakkersuisut peqquneqarlutik, inuusuttut amerlanerit allamiut oqaasinik ilinniarnissamut siunertaqartumik nunani allani ilinniarsinnaanerannut periarfissanik sulissutiginninissaannik. Inatsisartut isumaqatigiissut aalajangiiffigisassatut siunnersuut akuersissutigaat. Taamaalilluni inatsisip ”*Efterskolit pillugit inatsisartut inatsisaat*”-niit taaguutaa allannngortinneqarluni imatut: ”

*Efterskolit pillugit aamma paarlaateqatigiinnermut tapit pillugit inatsisartut inatsisaat.*

Taamatuttaarlu pisinnaatitsinermut aalajangersakkammik ilanngussisoqarpoq, tassani Naalakkersuisut pisinnaatinneqarlutik tapiissutinik tunniussisarnermi, tapiissutinik annertussusiliisarnermi immaqalu isertitanut nalimmaassaasiisarnermi, qinnuteqarnermi immersugassanut, kiisalu naammagittaalliorsinnaanermut malittarisassat pillugit nalunaarusiornissamut.

Naalakkersuisunit Efterskoleqartarneq pillugu siunnerfilimmik nalilersuinissaq pilersaarusiorneqarmat, taakkua saniatigut malittarisassaliortoqarsimavoq, Danmarkimi Efterskolimi ilinniarnermi tapiissutinik isertat nalimmassarneqartarnissaannik.

#### **Siunnersuutip inatsisartuni siullermeerneqarnera.**

Siunnersuutip inatsisartuni siullermeerlugu oqaluserineqarnerani siunnersuut tamanit tapersorsorneqarpoq, partiit tamarmik nuannaarutigaaat siunnerfilimmik nunani allani paarlaateqatigiilluni ilinniarnermi tapiissuteqartalernissaa. Ilaatigut nunarsuarmioqataanermi oqaatsinik arlalinnik piginnaasaqarnissaq pisariaqartutut isigineqarluni aammalu neriuutigineqarluni tapiisarneq ima isumaqartinneqqassasoq, inuusuttut ilaqutariinnit isertitakitsunit pisut amerlanerit nunanut allanut paarlaasseqateqarlutik ilinniariartortarsinnaanerat.

**Inuit Ataqaatigiit** tamakkiisumik siunnersuut tapersorsorpaat, inassutigalugulu taamatut isikkoqarluni aappaassaanniigassannngortinneqarnissaanut.

**Siumut** siunnersuummut tapersiinini oqaatigaa, nuannaarutigalugulu amerlanerit paarlaasseqatigiilluni ilinniariartortarnissaannik Danmarkimuinnaannitsoq aammalu nunanut allanut.

**Demokraatit** siunnersuut taperserpaat, erseqqissaatigalugulu pingaaruteqartoq inuusuttut amerlanerit kalaallisut qallunaatut tuluttullu piginnaasaqarnissaat.

**Atassut** siunnersuut tapersorsorpaat, inassutigalugulu taamatut isikkoqarluni aappaassaanniigassannngortinneqarnissaanut. Tamatuma saniatigut oqaatigineqarluni neriuutigineqartoq inuusuttut amerlanerit Kalaallit Nunaat qimallugu ilinniariartortarnissannik.

**Kattusseqatigiit Partiiat** siunnersuut tapersorsorpaat oqaatigalugulu, nunani allani paarlaasseqatigiilluni iliniarnernut tapissuteqartarnissaq inuiaqatigiinnut tamanut iluaqutaassasoq.

#### **tusarniaanermi akissutit**

Inatsisissatut siunnersuut 31. Maj. 2012-miit 6. Juni. 2012-mut tusarniutigineqarsimavoq, imatut oqaatigalugu sapaatip akunnerini tallimani. Ataatsimiititaliamit maluginiarneqarpoq inatsisissatut siunnersuutip ajornakusoornera eqqarsaatigalugu tusarniaanermi piffissaq naammaginarpoq. Tusarniummik nassinneqarsimasunit 51-usunit tusarniaaffigineqartut 12-it tusarniaanermut akissuteqarnissamut aalajangiussaqaarsimapput, taakkunannga 4-it allassimallutik tusarniaanermut oqaaseqaatissaqaratik. Tusarniaanermut atatillugu allanik oqaaseqaatissaqanngilaq.

#### **Siunnersuutip ataatsimiititaliamit suliarineqarnera**

Ataatsimiititaliap naammagisimaarlugu paasisimavaa, siunnersuut siullermeerneqarami tamakkiisumik tapersorsorneqartoq.

Ataatsimiititaliamit maluginiarneqarpoq efterskolit pillugit inatsisip allanngortinissaanut siunnersuummi naalakkersuisut pisinnaatitsissutinik marlunnik ilanngussisimanerat. Siulleg paarlaasseqatigiilluni ilinniarnermut tapissutinut, kiisalu tapissutinik tunniussisarnermi, tapissutit annertussusaannik, immaqalu isertitanut nalimmassaatitut tunniussisarnermi, aamma qinnuteqarnermi naammagittaalliornermilu malittarisassanik naalakkersuisut tunngavissaannik pisinnaatitsissut.

Pisinnaatitsissutip aappaa tassaavoq Danmarkimi Efterskolimi ilinniarnermi tapiissutit annertussusaasa isertitat tunngavigalugut naatsorsuinermi tunniunneqartarnissaanut psinnaatitsissut. Pisinnaatitsissut Naalakkersuisut ivertissimavaat, Naalakkersuisunit kissaatigineqarmat Efterskolit tamarnik nalilersorneqarneranut atatillugu paasineqassagalarpat pisariaqartoq, siunnerfilimmik isertitat tunngavigalugit tapiissuteqartarnissaq. Ataatsimiititaliamit maligineqarpoq, pisinnaatitsissut tamanna allannguinerut atatillugu ikkunneqarsimasoq, tassani pineqarluni paarlaasseqatigiilluni nunani allani ilinniarneq.

Ataatsimiititaliamit pissusissamisoortut isigineqarpoq Efterskoleqarneq tamarni nalilersorneqassappat, kingullernik nalilersuineq 2005-mi pisimasoq eqqarsaatigalugu, aammalu ataatsimiititaliamit qilanaarineqarpoq nalilersuineq pillugu ilisimatinneqarnissamut, aammalu qanoq inernilerneqarnissaanut tunngavissaqarnersoq.

Ataatsimiititaliamit maluginiarneqarpoq, Ataatsimiititaliap UKA2010/68 isumaliutissiissut pillugu kaammattuutaa naalakkersuisut malinniarsimammassuk. Isumaliutissiisummi tassani ima allassimalluni.

*”Siunnersuutip uuma piviusunngortinneqarnissaanut suliaqarnermi nunani allani atuartunut tapiissutaasartut annertussusaasa angajogqaat isertitaanmut attuumassuteqalersinnaanissaannut soorlu Kalaallit Nunaanni Efterskolertarnermut tapiisarneq assigalugu periarfissanik misissueqqullugit Naalakkersuisut sakkoortuumik ataatsimiititaliamit”.*

Ataatsimiititaliamit tunngaviusumik isumagineqarpoq, inuusuttut ilinniarnermut atatillugu Kalaallit Nunaanni Danmarkimi imaluunniit naalagaaffeqatigiinerup killeqarfiisa avataani nunani allani efterskolerniartillugit ilaqutariittut ataasikkaatut aningaasatigut isertitaat apeqqutaasariaqanngitsoq.

#### **Siunnersuutip aningaasatigut kingunissai**


Ataatsimiititaliap aningaasatigut kingunissaritinneqartut oqaaseqaatini nalinginnaasuni ilanngunneqarsimasut tusaatissatut tiguai, kisiannili inassutigalugu, Naalakkersuisunit immikkoortumi pineqartumi aningaasatigut tunngavissaritinneqartut ataatsimiititaliap nalilersuinermini tunngavigissagai.

Ataatsimiititaliamit maluginiarneqarpoq, Naalakkersuisut naatsorsuutigigaat tapiisarnermi isertitat tunngavigineqalernerisigut, pissarinnerusut annikinnerusumik tapiiffigineqartarnissaannik imaluunniit tapiiffigineqassaarnissaannik kinguneqassasoq kiisalu pissakinnerusut inuusuttortaminnik paarlaassilluni nunanut allanut iliniariartortitsisinnaanerat annertunerusunik atorneqalerumaartoq. Taamaalillutik Naalakkersuisut nalilerpaat siunnersuutip akuerineqarneratigut aningaasatigut kingussanngitsutut, aammalu ataatsimiititaliamit ilimagineqarluni atuinerusoqassagaluarpat tamanna atugassaritinneqartut iluini matussuserneqarumaartoq.

**Ataatsimiititaliap inassuteqaataa**

**Tamanna tunuliaqutaralugu ataatsimiititaliap isumaqatigiittup siunnerssuut akuerisassanngortippaa**

Taamatut oqaaseqaateqarluta aammalu isumaliutissiisummi allassimasunut aallaavigalugit ataatsimiititaliap matumuuna aappassaanniigassanngortippaa.



Hans Aronsen

Siulittaasoq




Jørgen-Ole Nyboe Nielsen

Siulittaasup tullia



Harald Bianco



Ruth Heilmann



Aleqa Hammond